

欽
定
全
唐
文

欽定全唐文卷一百九十七目錄

駱賓王 一

蕩子從軍賦

螢火賦

靈泉頌

爲齊州父老請陪封禪表

自敘狀

對策文三道

上吏部裴侍郎書

欽定全唐文

卷一百九十七

目錄

與程將軍書

答員半千書

與博昌父老書

與親情書

與親情書

欽定全唐文卷一百九十七

駱賓王 一

賓王婺州義烏人初爲道王府屬歷武功主簿調長安武
后時數上書言事下除臨安丞怏怏失志棄官去徐敬業
舉兵署爲府屬軍中書檄皆其詞也

蕩子從軍賦

胡兵十萬起妖氛漢騎三千掃陣雲隱隱地中鳴戰鼓迢
迢天上出將軍邊沙遠離風塵氣塞草長萋霜露文蕩子
辛苦十年行回首關山萬里情遠天橫劍氣邊地聚笳聲

鐵騎朝常警銅焦夜不鳴抗左賢而列陣比右校以疏營
倉波積凍連蒲海雨雪凝寒遍柳城若乃地分元徼路指
青波邊城煖氣從來少關塞元雲本自多嚴風凜凜將軍
樹苦霧蒼蒼太史河旣拔距而從軍且揚麾而挑戰征旆
凌沙漠戎衣犯霜霰樓船一舉爭沸騰烽火四連相隱見
戈文耿耿懸落星馬足駉駉擁飛電終取俊而先鳴豈論
功而后殿征夫行樂踐榆溪倡婦銜怨坐空閨薜蘿舊曲
終難贈芍藥新詩豈易題池前怯對鴛鴦伴庭際羞看桃
李蹊花有情而獨笑鳥無事而恒啼蕩子別來年月久賤

妾空閨更難守鳳凰樓上罷吹簫鸚鵡杯中休勸酒同道
書來一雁飛此時緘怨下鳴機裁鴛帖夜被薰麝染春衣
屏風宛轉蓮花帳夜月玲瓏翡翠帷箇日新粧始復罷祇
應含笑待君歸

螢火賦

余猥以明時久遭幽繫見一葉之已落知四運之將終悽
然客之爲心乎悲哉秋之爲氣也光陰無幾時事如何大
塊是勞生之機小智非周身之務嗟乎綈袍非舊白首如
新誰明公冶之非孰辨臧倉之愬是用中宵而作達旦不

瞑覩茲流螢之自明哀此覆盆之難照夫類同而心異者
龍蹲歸而宋樹伐質殊而聲合者魚形出而吳石鳴苟有
會於精靈夫何患於異類況乘時而變含氣而生雖造化
之不殊亦昆蟲之一物應節不愆信也與物不競仁也逢
昏不昧智也避日不明義也臨危不懼勇也事有沿情而
動興因物而多懷感而賦之聊以自廣云爾

伊元功之播氣有丹鳥之賦象順陰陽而亭毒資變化而
含養每寒潛而暑至若知來而藏往既發揮以外融亦含
光而內朗若夫小暑南收大火西流林塘改夏雲物迎秋

忽凌虛而赴遠乍排叢而出幽均火齊之宵映如夜光之
暗投逝將歸而未返忽欲去而中留入槐榆而焰發若改
燧而環周繞堂皇而影泛疑秉燭以嬉遊點綴懸珠之網
隱映落星之樓乍滅乍興或聚或散居無定所習無常翫
曳影周流飄光凌亂泛艷乎池沼徘徊乎林岸狀火井之
沈熒似明珠之出漢值衝飈而不烈逢淫雨而逾煥炤灼
今若湛盧之夜飛的皪兮像招搖之夕爛與庭燎而相炫
照重陰於已昏共燭火而齊息避太陽於始旦爾其光不
周物明足自資偶仙鼠而伺夜對飛蛾之赴燬類君子之

有道入暗室而不欺同至人之無迹懷明義以應時處幽
不昧居照斯晦隨隱顯而動息候昏明以進退委性命兮
幽元任物理兮推遷化腐木而含彩集枯草而藏烟不貪
熱而苟進每和光而曲全豈如鎔金而自鑠寧學膏火之
相煎陋蟬蛻之習蛻怵螻蟻之慕羶匪傷蜉蝣之夕不羨
龜鶴之年搶榆飛而控地搏扶起而垂天雖小大之殊品
豈逍遙之異筌夫何化之斯化無使然而自然乃若有來
斯通無往不至排朱門而獨遠昇青雲而自致匪偷光於
鄰壁寧假輝於陽燧終徇己以效能靡因人而成事物有

感而情動迹或均而心異響必應之於同聲道固從之於同類始未明其趨舍庸詎識其旨意子尚不知魚之爲樂吾又安能知蜚之爲利高明今有融遷變今無窮牛哀條而化虎羽泉忽今生熊血三年而藏碧魂一變而成虹知戰場之化燐悟冤獄之爲蟲彼翺飛之弱質尚矯翼而凌空何微生之多蹟獨宛頸以觸籠異璧光之照廡同劍影之埋豐覲道迷而可復庶鑒幽而或通覽光華而自照顧形影以相弔感秋夕之殷憂嘆宵行以熠燿熠燿飛今絕復連殷憂積今明且煎見流光之不息愴驚魂之屢遷如

過隙兮已矣同奔電兮忽焉儻餘光之可照庶寒灰之重然

靈泉頌

聞夫元功幽贊靈心以有德是親至道冥符篤行以通神
爲本若乃天經地義色養叶於因心夏清冬溫愛敬宏於
錫類下逮六幽之奧上洞三光之精不有至誠孰云斯感
有廣平宋思禮字過庭皇朝永州刺史昉之適孫戶部員
外順之長子伶丁偏露早喪慈親永懷鞠養之恩長增思
慕之痛弱不好弄長而能賢趨庭聞詩禮之風亢宗助曾

閔之行事後母徐以至孝聞北面興悲泣高堂而咎己東
遊下位歡微祿以逮親調露二年來佐百里俯就微班之
列將申返哺之情苟立身其若斯於從政乎何遠時歲亢
旱金石行銷遠近川原殆將堙絕濬井皆爲湯谷通波盡
化汚池太夫人在遲暮之年有溫勞之疾非溫漿不可以
適口非源泉不可以蠲疴色養旣虧憂惶靡訴俄而廳堦
之下忽有清泉自生因疏導其源遂流注不竭味甘若醴
氣冷如冰此邑城控剡山地連禹穴基址多石岡阜無津
爰自興建以來久微穿汲之利非精誠貫於有道純志浹

於無私孰能洽冥貺以通幽導靈泉而致養者也昔漢臣
忠烈窮井飛於一言姜婦孝思潛波移於七里靜惟陳迹
彼亦何人蕭縣尉柳冕耿介之士也道合則金蘭若膠漆
情異則軒冕猶埃塵片善可嘉朝聞甘於夕死一諾猶重
黃金賤於白圭以爲執友素交豈輕肥利祿之謂也賞音
達禮寧鐘鼓玉帛之云乎所恥者沒而無稱所貴者存而
不朽徒懷美志未遇良材某出贊荒隅塗經勝壤三秋客
恨長懷宋玉之悲一面交歡暫雪桓譚之涕觀斯水之清
泚感若人之精誠見賢思齊仰圭璋而有地揮毫興頌鏤

琬玉以無慚乃作頌曰

粵若稽古厥初生民其誰不孝獨我難倫義不悖道仁不遺親愛敬盡力孝弟通神願我罔極因心感至冥契動天甘泉涌地泠泠無竭蒸蒸不匱曾是我思永錫爾類爰有勞人景行芳塵事諧則感道治斯親孝爲禮主名爲實賓倘斯文之不墜知盛德之有鄰

爲齊州父老請陪封禪表

臣聞元天列象紫宮通北極之尊大帝凝圖宏猷暢東巡之禮是知道隆光宅旣輯玉於雲臺業紹禋宗必塗金於

日觀陛下乘乾握紀纂三統之重光御辯登樞應千齡之
累聖故得河浮五老啟赤文於帝期海薦四神奉丹書於
王會瑞開三脊祥洽五雲旣而輯總章之舊文紹辟雍之
故事非烟翼馭移玉輦於梁陰若月乘輪秘金繩於岱嶽
臣等職均芻狗陰謝桑榆幸屬堯鏡多輝照餘光於連石
軒圖光耀追盛禮於樞金然而鄒魯舊邦臨淄遺俗俱沐
二周之化成稱一變之風境接青疇俯瞰獲麟之野山開
翠岵斜連辨馬之峯豈可使稷山遺氓頓隔陪封之禮淹
中故老獨奉告成之儀是用就日披丹仰璧輪之三舍望

雲杼素叫天闌於九重儻允微誠許陪大禮則夢瓊餘息
仰仙闕以交懽就木殘魂遊岱宗而載躍

自敘狀

伏奉恩旨令通狀自敘所能某本江東布衣也幸屬大鑑
貞觀合璧光輝易彼上農叨茲下秩於今三年矣然而進
不能談社稷之務立事寰中退不能掃丞相之門買名天
下徒以黃離元吉白賁幽貞沐少海之波瀾照重光之麗
景雖任能尚齒載宏進善之規而觀過知人異降自媒之
旨是用披誠瀝懇以抒愚衷若乃忘大易之謙光矜小人

之醜行彈冠入仕解褐登朝飾懷祿之心效當年之用莫不徇名養素勵朽磨鉛自謂身負管樂之資志懷周召之業若斯人者可勝道哉而修譽察能聽言觀行捨真筌而擇士沿虛談以取才將恐有其語而無其人得其賓而喪其實故曰知人不易人不易知抑又聞之知臣莫若君知子莫若父誠能簡材試劇考績求功觀其所由察其所以臨大節而不可奪處至公而不可干冀斯言之無虧於從政乎何有若乃脂韋其迹乾沒其心說已之長言身之善覲容冒進貪祿要君上以紊國家之大猷下以瀆狷介之

高節此凶人以爲恥況吉士之爲榮乎所以令銜其能斯
不奉令謹狀

對策文三道

問岱岳遊魂入佳城而恒化瀛洲羽客竦鶴轡而輕舉雖
則備於縑素昭晰可觀求諸耳目虛無罕驗棄杖成龍有
異虞翻之旨銜恩結草寧符宗岱之言二者何從爾其揚
摧

對遐觀素論眇覲元風惟鬼惟仙難究難測至夫滕公長
往佳城開白日之徵洪崖不歸層邱控紫雲之蓋或崇成

蒼狗自是趙王之神道叶赤龍爰通陸安之治玉壘變萇
宏之血金闕化浮邱之靈固能目覩桑田來作西王之使
魂遊蒿里還爲北帝之臣然而將聖生鄒本忘情於語怪
多材封魯亦默論於通仙洎乎大義旣乖斯文將墜於是
八儒三墨之道異軫分馳九流百家之文殊途競爽語仙
則有無交戰語鬼則虛實相紛遂使結草抗軍爰乖宗岱
之論化竹游水有異虞翻之言然而博訪古詩緬尋曩冊
徇其浮說徒有奔競之談求諸至言抑匪通經之旨何則
高明瞰室已著六爻之文太虛游形式編三洞之籙故齊

君出獵遇豕啼於貝邱周嗣登仙游鶴軒於洛浦況乎干
寶碩德已輯搜神之書劉向通儒非無列仙之傳斯皆實
錄諒匪虛談謹對

問士農工商四民各業廢一不可取譬五材而闕里致言
鄙於學稼漆園起論爰稱絕機豈先聖垂文義有優劣將
隨方設教理或變通者哉汝其矢陳用啟前惑

對出震登皇垂衣裳而馭籙乘乾踐帝順舒慘而字氓莫
不列九土以開疆因四人而安業故農爲政本兩漢舉力
田之勤財用聚人九市列惟金之利陟龍門而就日入仕

彈冠斷蟬翼以成風追工運斧咸用因人成事隨利濟時
蓋五帝通規三王茂範然則泣麟上聖訓三千以領徒夢
蝶幽人搏九萬以齊物欲使邱門志學折以問農之言漢
渚絕機抒以灌園之巧斯乃變通權數趨舍適宜當今海
內乂安天下樂業士食舊德農服先疇自可孫宏獻書以
待公車之制王丹載酒時慰田家之勞謹對

問四十強仕七十懸車著在格言存諸甲令然則顏駟韞
價殆乎白首和尊播美始自齒年欲使滋泉之彥必臻洛
陽之才無捨則隄防或爽襟帶徒施其道如何佇聞嘉答

對竊聞大人有作義佇良材貞士徇名理資明主是知君
必待士士必待君故使飛龍在天聖智有賢明之佐巨魚
縱壑元后得唐虞之臣然則否泰或爽材運難并歲漸懸
車尚牧淄原之豕年甫志學且珥漢庭之貂是知因藉時
來和君播元齟之俊當其未遇顏生致白首之勤語其古
今稽之運會雖則人事抑亦天時當今乘六御天得一居
帝翹車獵彥束帛旌賢故叢桂幽人罷韜真於文豹青蓮
江使自裂兆於非熊豈止洛陽之才來儀漢國滋泉之叟
降止周朝而已哉某談乏二龍識迷三豕徒以鑽木輕炤

仰昇扶而耀輝化草餘光對含桂而炫彩迴皇如失俯仰
多慙謹對

上吏部裴侍郎書

四月一日武功縣主簿駱賓王謹再拜奉書吏部侍郎裴
公執事易曰書不盡言言不盡意然則理存乎象非書無
以達其微詞隱乎情非言無以筌其旨僕誠鄙人也頗覽
前事每讀古書高堂九仞曾參負北向之悲積粟萬鍾季
路起南遊之嘆未嘗不廢書輟卷流涕沾襟何則情蓄於
中事符則感形潛於內迹應斯通是用布腹心瀝肝膽庶

大雅含宏之量矜小人惻歎之誠惟君侯察焉賓王一藝
罕稱十年不調進寡金張之援退無毛薛之游亦何嘗獻
策干時高談王霸銜才揚已歷詆公卿不汲汲於榮名不
戚戚於卑位蓋養親之故也豈謀身之道哉不圖君侯忽
垂過聽之恩任以書記之事儼人則多慚阮瑀入幕則高
謝郗超昔聶政荆軻刺客之流也田光豫讓烈士之分也
咸以勢利相傾意氣相許尚且捐軀燕趙甘死秦韓今君
侯無求於下官見接以國士正當陪麾後殿奉節前驅賈
餘勇以求榮效輕生而答施而顧逡巡於成命躊躇於從

事者徒以夙遭不造幼丁閔凶老母在堂常嬰羸恙藜藿
無甘旨之膳松楸闕遷厝之資撫躬存亡何心天地故寢
食夢想噬指之戀徒深歲時烝嘗崩心之痛罔極若僕者
固名教中一罪人耳何面目以奉三軍之士乎況屬天倫
之喪奄踰七月違膝下之養忽以三年而凶服之制行終
哀疚之情未洩興言永慕舉目增傷夫怨於心者哀聲可
以應木石感於情者至性可以通神明故徐元直指心以
求辭李令伯陳情以窮訴上以棄興王之佐命下以全奉
親之篤誠而蜀主不以爲非晉君待之愈厚此二人者豈

貪貧賤惡榮華厭萬乘之交甘匹夫之辱也蓋有不得已者哉人有乾沒爲心脂韋成性捨慈親之色養許明主以驅馳內忘顧復之私外存傳會之眷薄骨肉厚榮寵苟背恩而自效則君侯何以處之且義士期乎貞夫忠臣出乎孝子旣不能推心以奉母亦安能死節以事人雖物議之無嫌實吾斯之未信也况流沙一去絕塞千里子迷入塞之魂母切倚閭之望就令觀以卒歲仰南薰之不貲而使憂能傷人迫西山而何幾君侯情深錫類道叶天經明恕待人慈心應物儻矜犬馬之微願憫烏鳥之私情寬其負

金定台曆卷一百九十一
恩遂其終養則窮魂有望老母知歸賓主死罪再拜

與程將軍書

三
昨見武郎將備陳將軍之言恩出非常談過其實恭聞嘉惠深用慚惶君侯懷管樂之才當衛霍之任豐功厚利盛德在人送往事居元勳蓋俗智足以興王業道足以濟蒼生尚且屈公侯之尊伸筦庫之士若下僕者天地一無用芻狗耳粵自旌賁之辰卽逢聖明之厯材不經務不能成佐命之功智不通時不能包周身之慮加以天資木強不能屈節權門地隔蓬心不能買名時議常願爲仁由已喪

我於吾見機可以絕機無用之爲有用隨時任其舒卷與
物同其波流者矣其於木也魯班無所措其鈎繩其於駕
也伯樂無所施其銜策不悟聖朝發明揚之詔君侯緝雍
熙之道曲垂提獎廣借游揚猥以樗櫟之姿忝預賢良之
薦當今鴻都富學麟閣多英非游夏不可以升堂非夔牙
不可以擊節倘片言失德事暴區中匹夫竊議語流天下
進乖得賢之舉退貽薄德之譏恐不肖之軀爲高明之累
耳必能一盼增價九術先登燕昭爲市駿之資郭隗居禮
賢之始則當效駑駘之用飾固陋之心陶鑄堯舜之典謨

憲章文武之道德上以究三才之能事下以通萬物之幽情將使詞翰爲行已外篇文章是立身岐路耳又何足道哉言而不慚者恃惠子之知我也所恨禁門清切造別無緣官守牽纏程期有限某尚期辭滿倘泛孤舟萬里煙波舉目有江河之限百齡心事勞生無晷刻之歡嗟乎流水不窮浮雲自遠露襟此別把袂何時恃以平生之私忘其貴賤之禮幸勿爲過謹不多談

答員半千書

張評事至辱惠書及詩把翫無厭蹙如有敘上言離恨下

助交情篤以猛風乾蘇之談彌以驟雨濕薪之喻雖聞義則徙道存於起予而擬人失倫事均乎玩物借如誠說蓋足下之不知言倘或劇談豈吾人之所仰望夫鯢之爲魚也潛碧海泳滄流沈鰓於勃海之中掉尾乎風濤之下而濠魚井鮒自以爲可得而齊焉鵬之爲鳥也刷毛羽恣飲啄戢翼於天地之間宛頸乎江海之畔而雙鳬乘雁自以爲可得而褻焉及其化羽垂天搏風九萬振鱗橫海擊水三千寧肯借翰於搶榆假力於在藻資江濱涓流之水待堀堞揚塵之風哉故張子房之達人也擊水搏風之適焉

朱買臣之屈已也戢翼沈鰓之致焉足下雅得古人之致
不乏先賢之遇自守莊筌無嬰魏網亦寧不知在藻搶榆
之力非擊水搏風之助哉而詞旨殷勤深所未諭盍言爾
志豈若是乎夫人生百年物理千變名利寵辱之形立矣
愛憎毀譽之迹生焉其有道在則尊德成而上幽貞爲虛
白之室靜默爲太元之門知軒冕是儻來悟榮華非力致
苟斯道之不墜亦何患乎無成而欲圖僥倖於權重之交
養聲譽於衆多之口所以楊朱徘徊於岐路阮籍怵惕於
窮途嗟乎霜往露來歲寒不待山高河廣離會無時桂樹

寒花公子去而忘返松巖春草王孫遊以不歸去矣員生
遠離隔矣音塵不嗣情其勞矣畏途窮谷靜躁殊矣惠而
好我無密爾音

與博昌父老書

月日駱賓王致書於博昌父老等承並無恙幸甚幸甚雲
雨俄別封壤異鄉春渚青山載勞延想秋天白露幾變光
陰古人云別易會難不其然也自解攜襟袖一十五年交
臂存亡略無半在張學士湑從朝露辟閭公倏掩夜臺故
吏門人多遊蒿里耆年宿德但見松邱鳴乎泉壤殊途幽

明永隔人理危促天道奚言感今懷舊不覺涕之無從也
過隙不留藏舟難固追維逝者浮生幾何哀緣物興事因
情感雖蒙莊一指殆先覺於勞生秦佚三號詎忘情於怛
化啜其泣矣尚何云哉又聞移縣就樂安故城廨宇邑居
咸徙其地里開阡陌徒有其名荒徑三秋蔓草滋於舊館
頽墉四望拱木多於故人嗟乎仙鶴來歸遼東之城郭猶
是靈烏代謝漢南之陵谷已非昔吾先君出宰斯邑清芬
雖遠遺愛猶存延首城池何心天地雖則山河四塞是稱
無棣之墟松楸千秋有切惟桑之里故每懷夙昔尚想經

過于役不遑願言徒擁今西成有歲東戶無爲野老清談
怡然自得田家濁酒樂以忘憂故可洽賞當年相歡卒歲
寧復惠存舊好追思昔游所恨企予望之經途密邇佇中
衢而空軫巾下澤而莫因風月虛心形留神送山川在目
室邇人遐以此懷勞增其嘆息情不遺舊書何盡言

與親情書

風壤一殊山河萬里或平生未展或睽索累年存沒寂寥
吉凶阻絕無由聚洩每積淒涼近緣之官佐任海曲便還
故里冀敘宗盟徒有所懷未畢斯願不意遠勞折簡辱逮

堙淪雖未敘言暫如披面晚夏炎鬱並想履宜賓王疾患
忽無況耳

與親情書

某初至鄉閭言尋舊友耆年者化爲異物少壯者咸爲老
翁山川不改舊時邱隴多爲陳迹感今懷古撫存悼亡不
覺涕之無從也詢問子姪彼亦凋零永言傷情增以悲慟
雖死生之分同盡此途而存亡之情豈能無恨終朝展接
以申濶懷取此月二十日柩桐成禮事過之后始得可行
祇敘尚賒仰繫何極各願珍勛遠無所詮

欽定全唐文卷一百九十八目錄

駱賓王 二

上瑕邱韋明府啟

和學士閨情詩啟

上司刑太常伯啟

上李少常啟

上兗州刺史啟

上兗州崔長史啟

上兗州張司馬啟

上齊州張司馬啟

上廉使啟

上郭贊府啟

上梁明府啟

上吏部侍郎帝京篇啟

欽定全唐文卷一百九十八

駱賓王 二

上瑕邱韋明府啟

賓王啟側聞戢翮觸籠負垂天而跼影伏櫪羈蹄望絕塵
而跼足故以遊蓮遇綈悟宋王於嬰羅在藻迷波顧蒙莊
於煦轍是以臨淄遣婦寄束緼於齊鄰邯鄲下客效處囊
於趙相伏惟明府公締址瓊峰靈岳蔽丹霄之景圖基珠
浦神流沃清漢之波玉札飛文綜宏詞於楚傳金籙緝藝
味雅道於扶陽孕蘭畹而生姿澧灞鍾高門之慶產銅溪

而寫鶚荆藍資象德之禎幼辨羝羊演飛龍之祕策夙談
孔雀對家禽之麗詞赤野浮銜價之光珠胎瑩色丹穴陪
來儀之迅鳳彩含姿靈襟轉壁綯逸照於蘭池神府驚蘋
韻清音於桂浦談叢散馥韞餘氣於九蘭筆海飛濤駭洪
波於八水綰銅麟甸製錦鳧郊化洽下車恩孚攬轡德聲
含詠仁風飄十地之雄道化編謠惠露灑三天之渥狎中
牟之馴雉豈懼驍媒驚重泉之瑞鸞非關照舞雖則塵飛
范甌垂銀有結綬之華而乃調理宓絃烹雞屈函牛之量
加以招攜白屋勸誘青衿遂使激流逸客望驥足以雲蒸

棲泌遺才歛龍門而霧會某緯蕭末品拾艾幽人寓迹雪
壇挹危直之祕說託根磬渚戢戰勝之良圖幸以奉訓趨
庭束情田於理窟從師負笈私默識於書林至於九流百
氏頗探其異端萬卷五車亦研其奧旨將欲優游三樂負
杖以終年棲遲一邱鳴絃而卒歲諒以糟糠不贍甘旨之
養屢空簞食無資朝夕之歡寧展是以祈安陽之捧檄儼
毛義之清塵思魯國之執鞭蹈孔聖之餘志屬以葢秋應
節雁序戒時飊金將露玉共清柳黛與荷細漸歇實舍毫
振藻之際離經析理之期不揆雕朽之材竊冀遷喬之路

輒期泛愛輕用自媒儻荆璞無見致疑夜光不逢按劍則
沈骸九死終望銜珠殞首三泉徒希結草載塵清矚跼影
外慙冒瀆威嚴循心內駭謹啟

和學士閨情詩啟

某啟學士袁慶隆奉宣教旨垂示閨情詩並序晚發珠韜
伏膺玉札類西秦之鏡照徹心靈同指南之車導引迷誤
竊惟詩之興作肇基邈古唐歌虞詠始載典謨商頌周雅
方陳金石其后言志緣情二京斯盛含毫瀝思魏晉彌繁
布在縑簡差可商略李都尉鴛鴦之詞纏綿巧妙班婕妤

霜雪之句發越清迥平子桂林理在文外伯喈翠鳥意盡
行間河朔詞人王劉爲稱首洛陽才子潘左爲先覺若乃
子建之牢籠羣彥士衡之藉甚當時並文苑之羽儀詩人
之龜鏡爰逮江左謳謠不輟非有神骨仙材專事元風道
意頗謝特挺戕伐典麗自茲以降聲律稍精其間沿改莫
能正本天縱明睿卓爾不羣聽新聲鄙師涓之作聞古樂
笑文侯之睡以封魯之才追自衛之迹宏茲雅奏抑彼淫
哇澄五際之源救四始之弊固可以用之邦國厚此人倫
俯屈高調聊同下里思入態巧文隨手變侯調慙其曼聲

延年愧其新曲走以不敏謬蒙提及謹申奉和輕以上呈
未近詠歌伏深悚慙謹啟

上司刑太常伯啟

側聞魯澤祥麟希委質於宣父吳坂逸驥實長鳴於孫陽
是則所貴在乎見知所伸由乎知己故雕其樸嶧山有半
死之桐賞其聲柯亭無永枯之竹伏惟太常伯公儀天聳
構橫九霄而拓基浸地開源控四紀而疏派自赤文薦祉
曲阜分帝子之靈紫氣浮仙函谷誕真人之秀本支百代
君子萬年道叶神交黃石授帝師之略德由天縱白星降

王輔之精峰秀學山列三墳而仰止瀾清筆海委四瀆以
朝宗登小魯之巖辨練光於曳馬臨大吳之國識寶氣於
連牛垂秋實於談叢絢春花於詞苑辯河飛箭激流翻白
馬之津文江散珠圓波漱驪龍之穴是用德茂麟趾削桐
葉以分珪道煥鶴池映桃花而曳綬旣而揆留皇鑒忠簡
帝心奉職春宮爍離光於青殿代工天府明台曜於紫宸
綜理元風變調元氣含輝禮樂皎愛日以流光毓彩文昌
映德星而開照若乃識度宏遠器宇疏通明允篤誠盛業
隆於后土惠和忠肅元功格於上天則伊陟謝其緝熙丕

咸慙其保乂舉才應器與士無私水鏡澄花炫金波於靈
府冰壺徹鑒朗玉燭於神機則鄧攸莫際其瀾盧毓罕窺
其術故使妍媸各安其分輕重不失其權五教克敷百揆
時敘折衝千里魯連談笑之工師表一時郭泰人倫之度
加以分庭讓士虛席禮賢片善經心揖仲宣於蔡席一言
合道接然明於鄭階某蓬蘆布衣繩樞韋帶自弱齡植操
本謝聲名中年誓心不期聞達上則執鞭爲士王庭希干
祿之榮次則捧檄入官私室庶代耕之願然而忠不聞於
十室學無專於一經退異善藏進殊巧宦搏羊角而高翥

浩若無津附驥尾以上馳邈焉難托實欲投竿垂餌晦名
迹於渭濱抱甕灌園絕機心於漢渚幸屬乾坤貞觀烏兔
光華嵩山動萬歲之聲德水應千年之色雖無爲光宅欣
預比屋之封而有道賤貧恥作歸田之賦於是揭來甕牖
利見金門指帝鄉以望雲赴長安而就日美芹之願徒有
獻於至尊蟠木之姿誰爲容於左右明公決幾成務論道
經邦一顧之隆駘足逾於仙驥片言之重魚目軼於靈蛇
庶望顧兔離箕動薰風於舜海從龍潤礎霑甘澤於堯雲
則膾餘之魚希振鱗於吳水膳後之豕翻化龜於魯津拜

伏階墀增懼木谷謹啟

上李少常啟

賓王啟竊惟陰陽作炭化一氣以陶甄天地爲鑪混萬物
爲芻狗然則璧輪均照或流景於萊城玉燭平分獨翔寒
於黍谷是汙隆迭襲榮悴相循得氣者繁滋失時者零落
伏以君侯疏乾激派龍門開竹箭之波鎮地橫基鵠翅峙
蓮花之嶺曜重暉於若月炳疊彩於非烟至若瑞動赤符
著元勳於東漢烽驚紫塞宣武功於北征奕葉龍光聯蟬
龜紐德由天縱白星降王輔之精道叶神交黃石授帝師

之略故得三千運北擊舜海以遊鱗九萬圖南望堯雲而
矯翰折衝千里魯連談笑之功師表一時郭泰人倫之度
於是九重銜紱懸星彩於宸維四達埋輪振霜威於權石
加以分庭讓士虛坐禮賢片善必甄揖虞翻於東箭一言
可紀許顧榮以南金賓王蟠木朽株散樗賤質牆面難用
灰心易寒退無毛薛之交進乏金張之援塊然獨居十載
於茲矣然而日夜相代笑溝壑之非遙貧病交侵思薛蘿
而可託欲乘幽控寂進綺季於青山樂道棲真從魯連於
滄海幸屬舜門廣關漢幣交馳遂得佇嘯高邱應箕文而

動韻聆吟大野浮艮岫以流陰將恐在藻纖鱗終寡登龍
之望棲榆弱羽徒仰搏鵬之高所冀曲逮恩光資餘潤於
東里襲承導引托輕夢於南柯撫已多慙循躬增懼謹啟

上兗州刺史啟

側聞未遇孫陽鹽車無絕塵之迹時逢和氏荆山有連城
之珍豈若聽清音於爨餘則枯桐發響收夜光於元璧則
怪石騰輝在物猶然況於含識者乎伏惟明使君鳳穴振
儀龍門標峻瓊雕岳立表秀干雲霞煥霜霏澄虛鑒物既
而代工入府忠簡帝心擁熊軾而撫百城建隼旗而臨千

里坐棠敷惠恩纏去思剖竹垂仁式歌來暮清凝夜燭化
警晨烏外勛九農內宏五教道之以禮樂齊之以刑書約
法遵寬設蒲鞭之恥立言惟信控竹馬之期甘雨隨車雲
低輕重之蓋還珠合浦波含遠近之星至如臥理稱難坐
嘯匪易披裳問疾垂愛景以字人褰帷廣聽穆薰風而扇
物飛霜秋降叶隼擊而防小人零露春濡飾羔旌而禮君
子於是仁必有勇吏不忍欺美譽鬱於三齊芳聲騰於萬
古若乃清規遠鏡皎月色於靈臺元鑒虛凝穆松風於智
府研幾十篋探頤九流縟翠萼於詞林絳仙花於筆苑文

江翻浪織玉激以韜霞學海驚瀾綴珠連於濯錦加以懸
榻待士擁篲禮賢汲引忘疲獎題不倦懷經味道之客望
範圍而駿奔兼流包略之夫窺義園以遐集求小善於毫
芥顧正禮於二龍振幽滯於泥沙許公明以一驥某淹中
故俗體朴厚之清規稷下遺趾陶禮義之餘化頗遊簡素
少閱縑緇每蟋蟀淒吟映素雪於書帳莎雞振羽截碧蒲
於翰池旣而學異懷蛟才非夢鳥價不齊於南漢芳不重
於東山幸屬日月光華雲霞紛郁方結羨魚之網將謠扣
角之詞奮短翮於檜榆希高標之餘拂濯織鱗於涓滴望

鴻澤之微霑所冀顧盼曲流翦拂增價則鉛刀起一割之
用跛鼈致千里之行是知竊混吹於齊竽濫飛聲於郢唱
抱山雞而自慙顧遠豕以多慙輕觸威嚴不遑流汗謹啟

上兗州崔長史啟

側聞豐城戢耀駭電之輝俄剖沙邱蹤迹躡雲之轡載馳
然則激溜侵星佩潛蛟於壯武騰鏹厯塊騁蹕駿於咸陽
且煦輶波鱗側羨鼇潭之躍觸籠雲翼局望鵬程之迅是
以齊郊夕唱牛歌挾白石之詞漢境朝趨車侯警拂塵之
思伏惟某公騰瀾浴景濬靈派以含珠擢幹捎雲翊孤巖

而聳桂崇基疊秀匡霸道於周盟茂緒聯輝贊文場於漢
戚偉龍章之秀質騰孔雀於觴年叶鳳彩之英資辯蟾精
於弱歲靈臺宏遠騁霄練於霜潭冊府幽深絢朝虹於璧
渚心波湛漢泳耀魄於黃陂情岳干天韜風雲於嵒嶽龍
津共濟競欣登御之車蕪室欽賢必攬澄清之轡鬱文條
而耀彩藻逸潘花蔚詞鋒而銜奇光浮衛玉然則崑溪旣
琢必見山川之精樹羽已懸行嗣雲韶之響是以佐龜陰
而演化務肅百城翼麟壤以宣風恩覃千里徽猷克著逾
盛德於休徵聲績聿宣軼英規於恭祖佩呂刀而邵美已

贊褰帷之遊屈龐驥而流芳將騁仁風之駕加以側階引
彥鑒駸子之微言倒屣延賓辯王生之雅量故使圓流之
下探照乘於長波高岫之巔剖連城於幽石某瓶罍小器
蟪蚊末材環帶嶧桐戢晞暘之厚德傍鄰汶篠慕貫時之
貞勁但以容膝一邱曲阜之瓢遽切枕肱五畝成都之壁
已窮擔石厭於糟糠負薪疲於裋褐然而少奉過庭之訓
長趨克己之方弋志書林咀風騷於七略耘情藝圃偃圖
籍於九流洒惠渥於羊陂屢泛文通之麥峻曲岸於鶯谷
時遺公叔之冠雖不能縱逸韻於霜皋唳野致九天之響

而頗亦蓄餘香於露薄垂芬有十步之芳而乃惡跡魯鴻
非荆山之抵鵲遙名韓犬歎稽阜之橫梁方今玉琯躔秋
金風動籟吳宮歸乙望陰岫以依遲素林返雁候陽潮而
低舉簾金味道之子佯纁帛以彈冠屑玉含毫之人望弓
旌而翹足竊不揆於庸識輒輕擬於揚庭所冀曲逮恩波
時流咳唾儻能分其斗水濟濡沫之枯鱗惠以餘光照霜
棲之寒女得使伏櫪駕寒希騏驥而蹠足竄棘翩翩排駕
鸞而刷羽則捐軀匪恡碎首無辭雖復投報揚金君子以
之貽戒效誠魏草小人之所懷恩輕瀆威嚴深懼履尾載

塵聽覽迫甚蹈冰謹啟

上兗州張司馬啟

某啟竊聞網澗緝裳僚指雲於偃蓋排虛止棘附絕電於
織離然則左右爲容鏘金有階於蟠木無因而至按劍致
懼於連城是以賃牘干榮發仞資於禽息求光抱燧束髮
濟於于髡伏惟某官瓊峯聳峭儼曦觀而爭峙瑤派驚瀾
泝天潢而比濬漢臺引路夕翊浮雲之陰晉閣垂璫朝煜
文星之苑劍池濯彩耀震德於渥津弱水攜祥炫離精於
丹穴辨懸瞳於朗鏡肇自觴年對似愧於虧陽光乎弱歲

言阿激箭浴紫貝以飛湍情岳驚峯蔽丹霄而傑峻文條
擢秀馥長坂之幽蘭筆苑揚葩煜小山之丹桂松飈結韻
摺紳藉以雌黃崑電流光通賢資其月旦於是佐褰帷於
魯甸威讐列藩匡露冕於梁陰恩覃絕境緝諧麟甸下白
鶴於仙庭輔弼鳧郊重黃金於帝里加以獎拔幽滯汲引
英髦錫以吹噓暖燕郊之陰谷延之顧盼炤漢圖之寒灰
某篠派庸微桐巖賤伍託根鄒邑時聞闕里之音接閑雩
津屢聽杏壇之說加以承斷織之慈訓得銳志於書林奉
過庭之嚴規遂容情於義圃方欲閉門却掃養拙以終年

幽遁鑿坏甘貧而卒歲直以栖遲五畝獲鷦鷯之數粒蕭
條三逕匱侏儒之斗儲雖則放曠林泉頗得閒居之趣而
乃寂寞蓬戶唯深色養之憂是以望檄動容慨南陽而聞
寂祈名夙駕嘆郢路而依遲方今涼秋屆節嚴飈扇序衡
陽極浦振朝音於負霜寒皋迴甸驚宵吟於靜野弓旌之
禮斯及辟聘之際是期不揆庸愚輕斯自銜所冀分其末
照惠以餘波得預觀光全由咳唾倘雲鑣釋綬申其漱玉
之音霜匣開輝照以盤蛟之影則陰山之雀敢懷滄蘂之
心漢東之蛇期致投珠之報不勝窘迫之至謹啟

上齊州張司馬啟

某啟昔者薛邑聞歌揖馮驩於彈鋏夷門命駕顧侯羸於
抱關何則志合風雲戴笠均乎乘馬情諧道術忘筌貴乎
得魚是以挹蘭言於斷金交蓬心於匪石庶清音動聽賞
流水於牙絃妙思通神叶成風於郢匠伏惟公疏源白水
浸地軸以輪波纂慶黃軒感星精而誕命綴珠華於七曜
聯玉葉於五雲至夫神石攜祥靈鈎表貺千年馭鶴振仙
駕於帝鄉七葉珥貂襲榮光於戚里固以紛綸國牒昭晰
家聲洎乎鹿走周原輔秦圖而興霸蛇分沛澤翌唐運以

開基常山王之玉潤金聲博望侯之蘭薰桂馥羽儀百代
掩梁竇以霞舉鍾鼎一時罩袁楊而岳立故得重規遠鏡
湛月路以流清茂祉遐鋪架雲門而擢秀英飛鳳穴藻五
色以凝華穎躍龍泉涵九重而毓潤風情踈朗霜明月湛
之資氣骨端嚴雪白冰清之概若乃性符神授道擅生知
挫三端於情峯朝九流於學海博聞強識辯晉國之黃熊
將聖多能識吳門之白馬言泉漱迴驚瀑布以飛瀾文江
澹清含濯錦而翻浪鬱槐市而增茂穆蘭室以流芳於是
翔鱣應符觀光上國飛龍成卦利見大人搏羊角以垂天

展驥足而騰景化貳藩邸紹敬祖之清廉光贊外臺陳君
回之亮直推公平而折獄磔鼠謝其嚴明擁端慤而字人
化蛇慙其智勇加以清規日舉湛虛照於冰壺元鑒露凝
朗機心於水鏡謙光自牧恭已愛人片善必甄揖虞翻於
東箭一言可紀許顧榮以南金某疾抱支離材均擁腫進
不能握蘭分竹縮銀黃於雲臺退不能絕粒茹芝煉金丹
於地肺而出沒風塵之內淪漂名利之間游無毛薛之交
仕乏金張之援塊然獨處者一紀於茲矣然而日夜相代
恐溝壑之非遙貧病交侵思薜蘿之可托常願處幽控寂

追夏黃於商山樂道棲真從魯連於滄海豈圖語默易爽
心迹難并題橋之恨愈深攀桂之情徒結是用絕深乾沒
耽閱邱墳謁子將於南荆訪康成於北海西遊梁益效司
馬王揚之風東入臨淄慕淳于管晏之智瞻言前古徒欲
思齊俯惟當今空勞懷刺不意雲浮礎潤霜落鐘鳴揖郭
泰於仙舟有道斯在賞融明於樽俎盛德猶存雖雅調清
歌誠寡和於郢路而庸音濫吹竊混奏於齊竽輕撮課囊
榆揚盛德庶金波離畢零陵之石自飛瑤光建寅蕭邱之
火漸燕學慚麟角德類鴻毛愧汗如漿憂心若厲謹啟

上廉使啟

賓王啟每讀書見古人負米之情捧檄之操未嘗不廢書
輟卷流涕傷心何則情蓄於中事符則感形潛於內迹應
斯通而悅帝力以栖魂情欣養素仰皇華而暢慮敢用披
丹伏惟公源控玉輪激神濤而涵地基疏金闕架飛岳以
韜雲泊乎鹿走周原霸燕圖於卽墨蛇分沛澤封漢爵於
華城福祿攸鍾公侯必復炳靈丹穴習吉黃裳若乃峯秀
學山列三墳而仰止瀾清筆海委九流以朝宗登小魯之
山辯練光於飛馬臨大吳之國識寶氣於連牛垂秋實於

翰林絢春花於文苑清規湛秀照月旦而雕談素論凝元
開夜光於妙辯旣而業成麟角引茅茹而彈冠道映鳳池
絢桃林而曳綬揆留皇鑒忠簡帝心奉職春宮標離光於
青殿代工天府明台燿於紫宸故得龍綽垂光戡兩星而
開照鶴蓋浮影翼五雲以連陰某大塊流形小人餘慶幸
河神入昴映白榆以流祥江使負圖泛青蓮而薦兆薰風
廣扇聖日多輝進不能高議雲臺談社稷之上務退不能
銷形地肺揖箕顙之餘芳而出沒風塵湮淪名利十年無
棣萬里惟桑旣而日遠長安出蓬門而西笑雲飄吳會遡

松浦以南浮冀塵迹邱中絕漢機於俗網承歡膝下馭潘
輿於家園不悟地絡遐張維白駒於空谷天羅迴布弋黃
鶴於高雲顧已驚鈍並從媒銜力農賤事未免東皋之勞
反哺私情遽切南陔之詠少希顧復輒布悃誠雖噬指思
歸空軫倚閭之望而嚙臂求仕非圖高蓋之榮明公資孝
履忠恕已及物惟幾成務論道經邦庶顧免離箕動薰風
於舜海從龍潤礎霈甘雨於堯雲則白羽書生自銘恩於
食稻黃裳童子將賽德於餐花拜首迴惶傾心霖霖謹啟

上郭贊府啟

賓王啟側聞樞精嘯谷韻清瀨於驚蘋震德昇乾霰元枝
而布暖雖涸鱗濡沫尚舐望於鯨波而決羽搶榆頗思遷
於鶯樹伏惟公瓊基疊秀積珠構於三龍玉翰驚華煜瑤
林於八桂仙飛有道縈河泛高尚之舟德驗通神靈策動
幽明之鏡產耶溪而濯質霜鐔廓豐匣之姿孕鍾嶺而飛
華虹玉絢荆巖之氣松秋表勁翊蘋霞而插極菊晚馳芳
涵清露而炫沼鑒懸龍鏡明逸照於咸陽韻入鳧鐘驚洪
音於長樂心源泛藻控鰲壑以朝宗情嶽披蓮掩龜岑而
作鎮惠牛曜辯驚荀鶴於談叢揚鳳摛文詠鄒龍於筆海

故佐銅章於磬渚側扇文鯨之風貳墨綬於銅郊讚誘祥
鸞之化絃揮單父弼清韻於嵇琴化洽中牟翊馴輦於潘
雉加以延賓置驛接士軾廬採拔芻微邁欽賢於司馬提
獎幽滯軼取俊於淳于某甕牖輕生席門賤品幸以參名
比屋悅康衢以自娛預迹耦耕欣日出而知作又以家傳
素業弋書林而騁志少奉庭訓馳文圃以遊魂至於白簡
青箱頗測探其奧旨竹書石記亦幽求其邃原雖未能叫
徹帝閭聲馳宰府而頗亦見推里閭譽浹鄉閭方今銀箭
纏秋金壺應節吮墨翹足希造杖於一枝味道彈冠望橫

經於重席不量庸昧竊冀揚庭伏乞恩波暫垂迴盼倘使
陳留逸調下探柯亭之篠會稽陰德傍眷餘溪之蔡則迴
眸之報不獨著於前龜清亮之音誰專稱於往笛雖滄溟
遠量敢不愧於牛渚而嵩岱洪恩終曾酬於蟻垤輕喧視
聽憂讐惟深猥瀆階庭兢惶交集謹啟

上梁明府啟

竊聞薛邑聞琴揖馮謖於彈鋏夷門佇駕顧侯羸於抱關
何則志合風雲戴笠均乎乘馬情諧道術忘筌貴乎得魚
是用挹蘭言於斷金效蓬心於匪石庶清音動聽賞流水

金匱要略卷之二十一
於牙絃妙思通神叶薰風於郢匠伏惟某公儀天峙構層
基控射牛之峯浸地開源驚濤疏釣鼇之浦至夫封侯廟
食掩金張以騫翥三主七公罩袁楊而岳立故得重規遠
鏡湛月露以流清茂趾霞鋪駕雲門而擢秀若乃博聞強
記辨晉國之黃熊將聖多能識吳門之白馬言泉漱迴驚
瀑布以飛瀾文江澹虛涵濯錦而翻浪於是功超食跖位
典烹鮮水鏡澄瀾照孤鸞之舞影鳴琴動操叶馴聲之雅
音旣而盛德有隣佐皇華而省俗居羣不器扈輶軒而觀
風某疾抱支離材均臃腫自弱齡植操本謝聲名中年誓

心不祈聞達始則執鞭爲仕帝里希干祿之榮次則捧檄
入官私庭庶代耕之樂然而忠不聞於十室學無專於一
經退異善交進殊巧宦搏羊角而遐翥浩矣無津附驥尾
以上馳邈焉難託實欲垂竿投餌晦名迹於渭濱抱甕灌
園絕機心於漢渚幸屬乾坤貞觀烏兔光華嵩山動萬歲
之聲德水應千年之色雖無爲光宅忻預比屋之封而有
道賤貧恥作歸田之賦明公顧盼成飾咳唾爲恩漏微潤
於江波流末光於隣燭幽禽遷木侶丹山於帝梧鳴石浮
川應黃鍾於僊管敢布心也詎能望焉謹啟

謹按此據永樂大典本採

入與今傳本詳略互異附載其後靈隱集上梁明府啟云
昔者聞歌薛邑賞彈缺於馮驩佇駕夷門揖抱關於侯子
豈惟成風之斷妙思通神流水之絃清音入聽況夫志合
者達心可采情諧者蘭味寧忘伏惟公儀天聲構層基控
射牛之峯浸地開源驚濤疏釣鼇之浦至夫封侯廟食掩
金許以霞舉三主八公羣袁楊而岳立於是功超振鷺位
典烹鮮水鏡澄瀾照翔鸞之舞影吟琴動操叶馴雉之雅
音旣而盛德有鄰佐皇華而撫俗君子不器扈輶軒以觀
風某蒲石橘遷聲鄉蓬轉不叶十室無專一經攀驥逸而
無由仰鵬飛而自失公顧盼成飾咳唾爲恩庶微潤於江
波冀末光於鄰燭使幽禽還木侶丹山於帝梧鳴
石在川應黃鐘於僊管敢布心也詎能望焉謹啟

上吏部侍郎帝京篇啟

賓王啟昨引注日垂索鄙文拜手驚魂承恩累息楚聲丹
質在荆南以懷慙遼豕白頭望河東而載惡賓王散樗易

朽蟠本難容雖少好讀書無謝高鳳而老不曉事有類揚
雄徒以易象六爻幽贊通乎政本詩人五際比興存乎國
風故體物成章必寓情於小雅登高能賦豈圖榮於大夫
蓋欲樂道遺榮從心所好非敢希聲刻鵠竊譽雕蟲至若
資醜行以自媒銜庸音而苟進固立身之殊路行已之外
篇矣君侯蘊明略以佐時虛靈臺以照物觀梁父之曲識
卧龍於孔明聽康衢之歌得飯牛於甯戚是用異人翹首
俊乂歸誠獨此疵賤之姿謬奉清通之盼雖仲由之瑟終
闕響於邱門而宋玉之謠儻均音於郢路敢忘下里輕用

上呈庶道叶起予陳卜商之四始恐吾幾失子效然明於
一言拜首增慙憂心如醉謹啟